

國

朝

詩

鐸

國朝詩鐸卷四

錢唐張應昌仲甫

關征

湖口行

胡會恩

青青石鐘山凜凜湖口關潯陽匯彭蠡九派奔潯潏東  
南估客度江津湖口新關愁殺人烏篷艇子大於葉朝  
去昏還兩算緡江邊怪石如刀戟衝濤觸船船寸拆誰  
能冒險瞬息停一任當關恣扣勒正稅還兼雜稅供雜  
稅何曾入大農一白新關移使者棹歌聲斷月明中

七關吏

王式丹

客子治行裝行行結徒旅人言舟行好陸行費資斧五  
月南風輕鴉軋鳴雙櫂挂帆泝清淮遙指公路浦大索  
聯艖艫當關吏如虎客子笑謂吏我行非商賈吏嗔汝  
勿言稅重豈獨汝纖毫報朝廷什伯私徵估三關合一  
關名減實倍取出門已復然前途更修阻沿緣到宿遷  
岸上呼何怒但催納稅錢不審隸何部上聞復下聞迢  
遞歷齊魯赫赫清源關乃在汝之許督權既有官濟甯  
更開府一里輸兩稅名項繁絲縷所幸蒙豁免破書及  
敝楮關吏恣饕餮孤篷困風雨離關向北來如魚脫網  
吾衡漳達天津苦遭三日拒橫索不敢辭如何在畿輔

天子方聖仁萬方荷噢咻 恩綸數蠲租温若母與  
額稅曾幾何中飽難指數維茲一葉舟輸金十有五塊  
復千萬艘聚斂歸何許安得萬言書叩頭告 黼宁

蕪湖關

查慎行

昨日出龍江今晨抵蕪湖順風滿帆幅過關快須臾關  
吏責報稅截江大聲呼舟子不敢前換舵轉轆轤余笑  
謂關吏奇貨我則無浩吟三寸管壓浪百卷書船頭兩  
巾箱船尾一酒壺此外更何物隨身長鬚奴吏前不我  
信倒篋傾筐籛棄捐無一可相顧仍睚盱買酒例索錢  
迴身若責逋有貨官盡征無貨吏橫誅有無兩不免何

以慰長途

關吏行

祝德麟

開板初開水勢鼓隨波  
艦舳紛翔舞一船橫截河當中  
忽見千船住篙櫓云是臨清關口阻  
卒如鬼吏如虎有客扣關關者怒  
未幾兩翼啟中流先放達官兼大賈  
其餘各各排檣守要檢篋箱搜金缶  
亦不索錢刀亦不需脯酒清晨停  
壓到曠黃不怕錢刀不入手東船嗟  
怨西船愁我舟瑟縮同淹留廿年  
冷宦歸休物只有書箱載兩頭

當關吏

王承祖

當關吏氣揚揚方舟橫波鐵鎖長千艘蟻集不許過盡  
俟閒暇來看船船中問何有倒篋復傾囊寸長尺短不  
足錄瞋目斜睨或恐有所藏我行無長物亂帙蠹走箱  
幡然一笑獨舍去磨丹漬墨不暇詳旁有大賈舟水痕  
千斛強蒐羅瑣細應計日珍秘得不爲所攘神竅鬼黠  
難意料但聞唧唧敢語行商量須臾指揮高岸立舟迴  
鎖落聲琅璫船頭打鼓燒利市檣欹柁側幅幅風帆張

內使行

景江錦

昂昂櫪馬脫轡銜內使奉命來監關內使來津吏怕學  
得主威恣叫罵朝陳雜戲暮歌筵水衡濫捲黃河瀉插

天洋舶高峩峩民間估船銜尾過夜檣列柵待完稅輸  
官敢道徵求苛探囊胠篋力掀簸蓬窗周遭捉私貨私  
貨見篙工啼滿船縛急如連雞榜笞敲扑莫逃罪罰鍰  
橫索千朱提死生由渠一轉轂得免官刑已蒙福賣兒  
貼婦錢未足內使揮金伎船宿

過關行

范來宗

三日過一關一關度一厄喧聲饒如虎毛髮洒過客無  
物尼不行有物罰不釋看船既有例打印亦有額揚揚  
坐奸胥遂逐走賤役行李剩殘書從晨守到夕

過關行

趙懷玉

三日過兩關一關一鎖鑰歸人思奮飛風利轉停泊長  
年畏津吏攜貨私納錢羈客請放行豪奴日高猶倦眠  
關前挂帆且暮候關上開筵酒肉臭吁嗟乎司農歲入  
十之一餘者盡歸若曹室利之所在弊卽因但有治法  
無治人天下患豈惟關津

水關行

程尙濂

長綃帶角風翩翩榜人眠檣坐叩關鐵絙浮舟二十四  
鼉梁橫跨相鉤連輕舸大艦集如蜩魚貫不許爭喧闐  
銳頭小胥躡絲履三三五五同愁轅吞舟之魚或漏網  
搜刮乃在秋毫顛一肩行李甚羞澀頭擲受侮如野干



野干獸名無日為諸童子  
摘擲受諸毒苦見法華經  
 我聞為關以禦暴異言異服  
 勤譏彈居奇大駟裁以稅豈令稗販輸緡錢采風使者  
 日旁午阿誰獻此芻蕘篇

蘆溝橋行

舒位

蘆溝橋來去路舉子忙關吏怒青袍中央坐麓官兩廊  
 吏役圍春寒公車厯碌止橋側一一呈取文書看彼官  
 肉食不識字以目上下偽作觀衣裳在笥書在腹公雖  
 無稅私有然為言客囊久羞澀恰有二百青銅錢供君  
 一飽如律合君其努力頻加餐  
試禮部者譏而不征麓其索錢以飯食為名麓  
 官睨錢如未足買菜拾矢再三瀆增之一分笑口開車

聲隱隱過橋來

杭州關紀事

又

杭州關吏如乞兒昔聞斯語今見之果然我船來泊時  
開箱倒篋靡不爲與吏言呼吏坐所欲吾肯從幸勿太  
瑣瑣吏言君果然青銅白銀無不可又言君不然青山  
白水應笑我我轉向吏言百貨我無一卽有八斗才量  
之不能盈一石但有萬斛愁賣之未嘗逢一客其餘零  
星諸服物例所不征君其勿卻有一串飛青蚨贈君小  
飲黃公壚吏睨視錢搖手呼手招樓上之豪奴奴年約  
有三十餘庸惡陋劣鬚有鬚不作南語作北語所語與

吏無差殊我且語奴休怒臆我非胡椒八百元宰相亦  
非牛皮十二鄭商人又非販茶去浮梁更非大賈來瞿  
塘問我來何國身但作賓客問我何所有笛一枝劍一  
口帖十三行詩萬首爾之仇敵我之友我聞榨酒稅不  
聞搜詩囊又聞報船料不聞開客箱請將班超所投筆  
寫具陸賈歸時裝看爾意氣頗自豪九牛何惜亡一毛  
爾家主人官不小豈肯悉索容汝曹况今尺一除礦稅  
捐棄黃標復紫標監察御史開口椒爾何青天白日鹿  
覆蕉奴聞我言慘不驕吏取我錢纏在腰斯時吏去奴  
欲去檳榔滿口聲齟齬彼齟齬我欸乃見奴見吏如見

鬼

坐大樓

王蘇

巍巍復巍巍大樓臨水湄  
 黠奴樓上坐帆檣不敢過  
 奴子一揮手礮聲響高阜  
 廛與命開關大艚珂峨走  
 貪賈私謁來奴子笑口開  
 稅一漏入九盜取府庫財  
 月成復歲會主人缺常稅  
 稅缺主罷官官錢不能完  
 主死貲產絕奴飽返鄉邑  
 經過舊坐樓依然翼中流  
 白晳美年少箕踞坐上頭

北新吏

美阮芸臺中丞也

中丞撫浙兼王關權政令寬簡商旅不擾

而北新關稅額贏足身所經見證以輿論乃作此詩

樂鈞

昔過北新關關吏猛如虎  
嗔喝啟箱囊見金卽奪取  
今過北新關但問來何許  
見我案頭書知我非商賈  
關開船卽行不煩詞說苦  
三年度此關吏胥不訶侮  
試問來往人皆言關易過  
問吏何能爾使者無煩苛  
賦稅自充裕豈在多網羅  
水清沙自潔官賢弊自絕  
飛權出錢唐桐廬看山月

關門謠

方于穀

緣頭籤一籤三百青銅錢  
硃紅票大票小票皆要鈔  
朝守關門暮守關門關門大  
開洞若無人守關猶自可  
丈量急殺我我船不過三丈  
長長短惟憑關卒量量船三

丈常報四五丈。船戶不敢擡頭望。可憐水腳活命錢。錢  
來都向關門填。如此司關敢壟斷。積錢高應堆天半。如  
何還虧尙方之錢過百萬。

坐關謠

劉珊

紫罽裁袍雙袖窄。足底蠻鞞不滿尺。酒氣咆哮聲似雷。  
樓上咤叱走胥役。一木阻同萬里城。虎豹當關肆毒螫。  
翻筐倒篋任搏撻。商額取什汝取百。或無奇貨供羨餘。  
惹惹明珠竟莫白。魚燭夜燃紫焰昏。市倡呼按紅牙拍。  
錦帳朝酣夢不醒。江頭自泣秋風客。可憐鷹犬獵狐兔。  
主人高臥門羅戟。事敗坐法罪安歸。此輩飽颺去無迹。

杭關吏

陳春曉

杭關吏踞守關南北南北設兩關權使有專職兩關之  
設爲通商往來行人何戚戚過關莫如杭關難道路有  
言齊歎息 國家稅入能幾何薄斂於民賦有式富商  
巨賈灑必征捆載而來津渡塞帑藏所關聽自輸百僅  
科一 聖恩溢其餘僕僕山程負擔勞熙熙水驛輕航  
集謳歌一任出於塗科條寬大明刊勒杭關何不然搜  
剔衆口傳 皇仁無遠邇權使皆循賢其奈當關僕從  
積習侮酒肉沈酣罔知商旅苦胥吏羣狐假虎威紛紛  
鬼蜮恣攫取高睨扁舟一葉來大聲疾呼亟停艣一胥

奮上船衆胥爪牙舞攘臂入艙中大索橫搜虜織悉零  
星一網收罰以偷漏客煩憂積少成多十倍求天涯逆  
旅苦垂頭

丈船行

黃燮清

大船峩峩泊官渡小船戢戢如蟻附大船小船相向停  
關吏不來三日任關吏丈船先索錢關吏得錢始丈船  
吏囊滿船身短吏腹枵船身高欲往揚州須腰纏不然  
畱看匡廬山安得黃金飽吏橐萬丈離愁爲我縮

貢獻

寶槓行

陸世楷



逆臣雄據西南際跋扈居然自稱帝驕蹇由來非一朝  
邸中服物多奢麗王師百萬困滇城城門夕啟官朝清  
可憐珠玉焚不盡滿宮玩好猶充盈珠玉全歸將士橐  
玩好雖存亦零落進御喧傳寶瑱名邴知人物同蕭索  
細腰宮女半雞皮傅粉伶人鶴髮垂此輩豈堪充殿陛  
坐令道路費驅馳道路驅馳一何亟夫輿舁送疲民力  
牙牀石榻青銅屏攣步僂肩喘不得逆臣據滇歲未久  
安得窮搜說希有應是前朝黔國遺掌握百年歸唾手  
沐公勛業炳丹青白蠻黑獠咸來庭後人席寵漸踰等  
器制或恐乖常經要知總屬亡國物得此詎足昭威靈

皇家不貴珍奇類，萬里徒勞貢闕廷。

龍衣舟行

黃永

逢逢鼉鼓溪邊過，百尺樓船萬鈞柁。大字黃旗隔岸飛，  
錦衣狷卒當窗坐。千人邪許向前行，赤棒前驅不計程。  
鳳簫龍管穿雲去，錦纜牙檣映日明。牙檣錦纜過江來，  
霧縠雲紈幾日開。誰頒將士充邊賞，誰賜宮娥稱體裁。  
聖明儉德恤民依，曾勅東南罷錦機。皇躬但飾朝天  
服，貴嬪應無曳地衣。偏憎賈客紛紜集，翠羽明珠載絡  
繹。爭居奇貨附舟行，敢假天威同僻易。嗟峨大編入皇  
州，往來南北春復秋。關吏郊迎晨負弩，郵亭續食夜傳

饑關津處處復留停物價高低自品評官府學俸三倍

利輿僿盡飽五侯鯖飛揚意氣真無敵長楫大槌縱橫

列畜怒偏工侮縣官先聲况可凌漕卒嗟余十載走風

塵幾度扁舟避野津聞道 皇家親浣濯民間仍苦虎

狠人

詩觀評 朝廷儉德自古未有乃若輩以尙衣之故恣肆若是此詩真可入告○賈客四句言裝搭

之苦關津四句言留停之弊侮縣官凌漕卒其惡至此

李中丞歌

黃連貢為宜邑所苦公奏免其半善政也詩以美之

高 詠

中丞李公真偉人功名炳炳圖麒麟青驄紺臆馳江漢

虎符玉節陳鵝鶴荆吳作鎮新開府九重南顧紆宵旰

邇來江南數十州荒村廢井風颼颼去歲蛟龍鬪不止

今年蠶蠶怒未休况聞 國家事征戰羽檄橫飛若雷  
電又聞 詔使索黃連徵書十道宛城邊刻期採辦苦  
不早軍帖督催何草草朝攜長鑊斷荒邱箐篁棘荆淨  
如掃我聞此物產益州棧道連雲劔閣愁 君王不貴  
難得貨小草奚足煩誅求李公聞之仰而思太平有道  
安爾爲封章前後十數上 詔書立下甦顛危其他善  
政不悉紀此事卽堪播青史監門繪圖何足奇宣公奏  
議誰能比

進鮮行

沈名蓀

江南四月桃花水鱗魚腥風滿江起朱書檄下如火催

郡縣紛紛捉漁子大網小網載滿船官吏未飽民受鞭  
百千中選能幾尾每尾匣裝銀色鉛濃油潑冰養貯好  
臣某恭封馳上道鉦聲遠來塵飛揚行人驚避下道傍  
縣官騎馬鞠躬立打疊蛋酒供冰湯三千里路不三日  
知斃幾人馬幾匹馬傷人死何足論只求好魚呈至尊  
進鱗魚人不得食飯以生雞卵和  
酒飯之充飢冰浸梅湯以解渴

金牀行

張鳳孫

博南山南北賤北江沙晃漾黃金色洪爐百鍊得精鏐  
一流貨取十千直蠻兒嗜利夙輕生剝木爲牀臨不測  
終朝三獲無錙銖失足往往蛟鼉食元明中使亟徵求

騷然一方廢耕織投崖落塹不知數貢作宮釵助容飾  
國家百度鑿有殷。可因則因革則革課從初額更不增  
聊爲職方存舊式恢揚前烈屬我 皇眷顧西南念民  
力特頒 明詔減什五。令甲永懸石深刻昔聞古聖淡  
無營蠲金沈珠示冲德物華地寶豈不貴嗜欲一開恐  
難塞百金罷役營露臺漢文用以肥其國 今皇節儉  
實過之要與黔黎共休息金牀金牀蓋舍旃莫與風濤  
相轉側

淳水蘭

官武岡州作

朱頰

茲邑出淳水其地產香蘭芳風迎鼻觀藻川紫莖攢都

梁名伊始古志言不刊客有好事者遺書請交歡幅終  
索秋佩欲我采岡巒班春會稅駕攬轡登岷岨朝陽多  
栲栲夕陽多稻樛馬舄及羊齒蒙茸蔽林端窮谷邃以  
深露珠浥漙漙幽人嘗絕迹豈肯當門闌披榛尋亦得  
深恐民力殫荔支貢暘死紅塵奔馬鞍洛陽進姚黃宋  
人生譏彈况復中谷蕕詩歌曠其乾我不結同列亦不  
媚上官坊州求杜若笑柄徒貪殘

唐時牒坊州求杜若  
蓋因芳洲多杜若之

詩而  
詛也

熟竹牀

王蘇

大官納新涼思臥熟竹牀是豈咄嗟辦磨礪工夫長牀

可頃刻寘竹難逡巡醉求舊不經新白暗殊紅臆臨安  
十萬家家響縑車翠篠絡冰絲千个淨無瑕斷竹復  
續竹生竹皮熟昇牀獻大官一段玲瓏玉晚來月二  
分鴛央嬌水紋姬姜交口譽何可無此君此君本小吏  
逢迎善心計明日彈甘蕉此君上青霄。

舉  
吟羨餘物

周瀛

朝廷有正供何物名羨餘積漸有由然斂索飽吏胥願  
粒黎民命虐取萬命屠關權更橫征名口不畏誣蠹國  
復殃民額外胡爲乎

貢象行

吳振棫



巨象垂牙鼻倒縮小象蹒跚重千斛歎沙捲石山谷動  
居人呼洵避入屋蠻奴騎象如騎牛牽控不假鞅與轡  
象房新築憎卑庠饋芻饋米懼象飢象飢猶可病奈何  
縣官跼蹐蠻奴訶蠻奴訶縣官起區區懷中金敢以辱  
遠使奴言縣官可歸矣病象猶能行百里

珠江樂府

開香門

袁翼

村祠疊鼓迎香神女兒盥手開香門香農衣食託香國  
但祈香樹多生根年年買香充香貢可憐香樹無人種  
官不愛香愛香錢錢多別購驪龍涎打鼓退衙品香譜  
那識山中香戶苦

海塘

捍海塘

潘耒

築塘誰湯信國開國元戎秉成畫約東海若麾天吳長  
隄如城捍潮汐修塘誰趙中丞經天緯地帝股肱頽防  
崩岸悉築塞不許蛟鱷橫憑陵越民食海亦苦海寇賊  
風濤時一駭只今萬里不揚波障田况有茲塘在我耕  
我耘我稼我禾鳴雞吠狗煙火桑麻無風魚災不見兵  
戈綢繆桑杜功如何海如杯山如螺中丞烈不可磨

築塘謠

施對宗

築海塘築天寒土塘易築石塘難不見帑金三十萬西

山木石連河干雪麤如拳墮築指築遲背怕牛皮鞭怕  
鞭還怕築不堅官賠家產工賠錢

築海塘築赤日早涼登築暮不息最苦金烏爍背時汗  
流滴石石噴噴豈不患令如焚豈不恤工如炙一寸疎  
虞蟻縫罅百萬生民化魚鼈

築海塘築春潮春潮初來浪不高縱然到岸僅沒胛不  
浸石縫工堅牢官賞酒稽首到地稱上壽但願功成官  
職超遠通職貢近通漕

築海塘築秋風秋風蕭蕭吹鬢蓬朝築暮築丈尺咫秋  
潮一洗還成空幸存白石石齒齒罅隙滿隄如漏蟻再

塗石髓與粘膠舊岸何如不洗牢

### 重築雲間捍海塘紀事

欽 璉

雲間東環瀛海碧波淼淼蛟蜃窟開元天子廛東南  
塘築捍海如山屹遂令滄海變桑田夏麥秋禾民樂業  
迄今千載塘浸圯齧足衝腰一綫窄中間修葺亦時聞  
東苴西補究何益余昔蒞符新造邦目覩殘隄心凜慄  
上書反覆數百言雍正丙午余宰南匯屬當路悠悠置  
不答未幾余亦解官去荏苒星霜又四易吁嗟天幸不  
可常奇災一旦生倉卒壬子七月十五夜鯨噓蛟噫龍  
戰血移山撼岳聲震驚倒峽滔天勢奔突可憐海濱千

萬戶夢中齊赴龍君宅大吏驚聞奏九重分遣僚屬  
徧存恤余亦奉使南邑來城郭人民感疇昔遺民痛哭  
爲余言吾儕生本傍海穴田廬歲歲怕秋潮隄防全仗  
一塘力如何束手任廢壞致使吾民遭異厄微軀如拾  
暫偷生茲塘不築終魚鼈余聆此言一長歎上聞每壅  
盈廷舌漢陽徐君蘇州守侃侃力贊數語決飛章上達  
帝曰俞金錢十萬何曾惜正月始和礮鼓鳴丁夫雲集  
不須檄乃知舉事從民欲筋骨雖勞意歡悅祇恐斯事  
民未諳先期告戒頗厯厯厥址惟寬厥巔銳坡須走馬  
背須鯽老木爲杵堅築其巨石如盤空際擲層層堆擊

土膏凝注以清泉闕不洩更栽嫩草護新壤盡塞古涵

瀾舊隙塘舊有涵洞數處今俱築塞海潮涓滴不得入吾民奉令踴躍趨奮力

爭先如赴敵汗日蒸雲肯少休羣工次第胥底績蜿蜒

長隄三萬丈塘自奉賢縣柘林城北起至寶山縣吳淞江口止長二萬九千八百五十餘丈百

尺巍峩聳天闕馮夷有怒不敢逞海底怪物惴屏息起

看災黎喜色孜從茲寤寐胥安帖余忝董率日驅馳是承築者五十人余與漢陽徐君總理

幸藉諸公免隕越作詩紀事代貞砥

增修勿墜望來哲

築塘謠海鹽三面海賴石塘衛之近歲秋汎作時不無所損然歲修不可不慎移東掩西虛

內實外工吏之奸宜預防之也作築塘謠

朱炎

登登聞築塘築塘衛廬舍伐石南山巔伐木南山下木

截訂梅花石琢排魚鱗鐵錠筋絡骨土備齒附齧截太作椿

五五相比日梅花椿築石上狹下濶縱橫間之日海門

魚鱗塘鐵錠以聯石交處積土護石曰土備塘

兩山夾怒濤一箭射吐納海與江來往潮又汝

天子時下詔陽侯近有靈磊磊海上石厯厯天上星沓

潮最足虞颶風秋作汛防秋如防邊避風如避刃風來

胡可避築塘計已周塘石小齟齬官府議歲修歲修誠

難爲倉卒慎次第有石不能言毋使失連理談山通驪

官驅馬看塘來莫謂踏石面安步過平臺

議修海塘有感而作

陳文述

太息魚鱗起石塘  
四年

純廟此巡方

翠華親蒞紆長策  
玉簡明禋錫

御香列郡田廬資保障  
萬家衣食賴農桑  
如何六十年  
來事容得天吳駭浪狂

安瀾先要息迴波  
搔首空吟瓠子歌  
當局無端期節用

改一年保固爲兩年又裁坦水歲修致工員畏累  
不報險工坦水樁石無典守之責致全行漂失 隔江

何事便升科  
對岸蕭山漲沙濛准升科致潮力不能沖  
刷併趨北岸日久塘根護沙盡去悉成險

上敵強深恐援師緩  
醫雜兼防諱疾多  
一語諸君須記

取海潮畢竟異黃河



莫將客氣誤民生籌策何妨畧變更多築盤頭挑漚轉

緩修坦水待江平人才原不關科目經濟終宜仗老成

最憶瑯嬛師相語師嘗云但求有益於國與民

何必功名自我出也

先人方畧苦綢繆回首宗盟感舊游初建石塘先府君佐刺史始終其事

余亦曾客家默齋幕中與聞修守踏月曾過海神廟嘯雲獨上水仙樓

假柯有曲君難謝借箸無才我欲愁畢竟治標兼治本

蕭山新漲最宜籌余謂蕭山新漲宜開河引潮以資沖刷迎潮仍恐沙壅宜以近江一面為

口口寬尾仄竝作川字河庶南坍北漲岸沙可復

履勘海鹽縣海塘偕王別駕鳳生陪帥仙舟撫軍履勘汪仲洋

兩浙濱海區風潮苦奔赴祖龍巡會稽馳道連秦駢鞭  
山徒妄傳捍海在工作坡陀變壘石縱橫任指顧纍纍  
十八層一氣如鐵鑄上殺而下寬不撓潮頭怒別有土  
備塘腹背相迴互昔譬肉傅骨氣脈兩親附潮漲排石  
來土塘內撐拄潮退吸土去石塘外遮布尤在椿木深  
不使崇墉仆左右兩山扼中讓全海注賴此一綫隄九  
郡得生聚念自前明來畚鍤厯朝屢石旣苦奔脫土亦  
遭盪瀦大府重海防險地親舉步情形辨緩急料物籌  
備具上爲帑項權下爲工員慮所恃衆志同屹若金隄  
固長風卷海飛現出沙塗護

海塘謠

嘉定額海之墟向有秋潮漂沒之害築塘捍禦雍正初割嘉定東鄙之吳淞地置寶

山縣城懸海滋遂獨當其害乾隆初邑令胡公仁濟添築護城石塘其害稍弭大吏逐年修築

防秋經費胥出帑藏道光十四年七月颶風潰塘大吏議以民錢築之二年塘成較前加高濶

然民力亦殆盡矣

張朝桂

孤城瀕海險且窄恰與馮夷分半席奔濤駭浪來渤海  
終日彈丸供蕩濶胡侯荆建石作塘百萬生靈全一壁  
外加椿石固且完歲歲增修有常額 天子不忍棄斯  
民帑藏何曾肯慳惜去年六月海揚波夜半塘傾水橫  
溢鯨噴鼉吼頃刻間民居盡作鮫人室浮飢數歲民未  
蘇陽九何堪遭此厄疆吏代帑議蠲修大戶輸銀小戶

役差役如狼吏如虎剗肉醫瘡徧搜索嗚呼安得化爲  
精衛鳥常向西山銜木石

河防

江防附

橋梁附

淮水溢

康熙己未十月  
泗州水入城

陶澂

川流浩無極湯湯日東之排決必就下庶鮮溺與饑後  
人何曲防變遷成沙瀾積久勢益壯中流漾蛟螭還聞  
淵漩底潛伏巫支祁昨者忽馮怒驚波蕩寒颶稽天正  
未已彷彿堯初時城郭苦卑溼周遭况如箕漏地及三  
版民命爭毫釐弭患謹未然是誠在有司浸淫入睥睨  
倉卒烏能治人事旣闕失丞民盡顛隳

隋隄行

乙巳七月考城黃河決夏邑不守水薄永城外郭城幾陷居人避于隋隄以免屢聞

朝廷憂民之深而治河者不力因有是作

王連瑛

長隄百里參差起拍岸驚濤響秋水隄上老人向客言  
手足尫黠皮肉死緬憶築河二十年長官下令括民錢  
白鏹朱提計畝入包工折掃黃河邊年年歲歲編夫速  
縣吏捉夫入人屋壯男編盡穉男行可憐無復完骨月  
前歲荆隆告竣事 丹書屢下憂民苦今年春旱民無  
食入秋以來始陰雨方期種黍色油油漸望築場聲許  
許七月飄風動千里浪翻沙走流雲駛夜半黃河天上  
來質明才五歲乙巳牀前活活河聲走電掣鯨奔風怒

吼馮夷擊鼓河伯怒豐隆決破土囊口始看盤渦沒蓬蒿漸見蛟龍來九皋高室轅轅深水府徐關碣石小秋毫燭龍照耀羣龍蠹一夜千聲萬聲哭婦子結襦渡亂流波濤相逐走雷轂風起沙黃浪更高樹頭鴟尾萬人號御風難假龍鼉力渡海空瞻烏鵲毛老夫夜來隄上樓嬌兒啗臂餓女啼曰幸生前見乾土詎甘餓死填溝谿丈人試看隄邊柳兩岸蕭蕭秃似帚採盡青枝爲塞河河今如此能塞否河勢頻勞 聖主計催役屢裁大官費似聞頒給內帑錢誰實封題外府寄累盡中原百萬家達官盛怒敢咨嗟爭似廿年作力苦何如一旦委

泥沙老翁絮語方未已北風捲波波立起魚沸鬱兮愁  
吾人波中之人長已矣吁嗟乎治河者誰河如此

高郵隄雜謠

魏麀徵

隄如綫河如箭水齧隄迸成電

昔田畝今沮洳昔廬舍陽侯居吁嗟我民波臣之餘  
雨散風止怒流齒齒官來喚役夫瘡民忍饑起

河水決

汪懋麟

黃河衝決淮河邊白馬湖中千尺浪淮陽城郭雲氣中  
遠近田廬水光上人行九陌皆流水螺蚌紛紛滿城市  
築岸防隄急索夫里中徭役齊追呼富家出錢貧出力

觸熱忍飢不得食十日築成五尺土明日崩開十丈五

河隄篇二

首

潘耒

良醫視病人察脈審其證悉病所從來治之藥乃應濁  
河本北流清淮自南互河徙勿奪淮淮弱而河盛一石  
八斗泥壅礙入海徑倒灌淮上流湖淤可涉脛堦堰始  
衝決淮南受其病塞決固治標要須遂其性下流無路  
行東過必西迸瘡平毒未消堡閉盜猶橫旁觀方憂危  
當局莫予聖

治河近稱善吾宗老司空

季

河徙時未久淮流尚爭雄

海口雖停沙可以水力衝淮主河乃客主壯客不攻用



清以刷濁當年策誠工淮今僅一線河漲猶難容淤沙  
 積成土不濬焉得通古方治今病和緩技亦窮疏濬費  
 雖多尺寸皆有功隄成倘蟻漏金錢擲波中

沈歸愚曰  
二詩見治

河要領貴通海口以淮刷黃也  
河隄使者宜書此詩於座右

開河行

唐孫華

朝開河暮開河要令斥鹵回盤渦朝點夫暮點夫里胥  
 追捕如亡逋當今 聖主仁如天濬河本為利農田興  
 作兼存救荒計鳩工盡發水衡錢嗟此河夫多菜色晨  
 餒何能待日昃五月官錢半未頽爾有肉糜從爾食千  
 鍬萬鍤聽鼙鼓三丈河身八尺土不辭霑體遍塗泥可

奈淋頭逢凍雨樹上愁看逐婦鳩桑間已有催耕扈歷  
久河工未告成農事匆忙漸旁午縱得青錢給一餐待  
舖不救妻孥苦更遣官長日巡工筆撻疲民恣訶怒非  
關民力怠工程自爲皇天不肯晴未看翠琰盈疇潤早  
見紅榴照眼明尙作官身繫河上何時隴畔得歸耕昔  
聞周夏兩名臣周文襄公忱夏思靖公原吉疏濬川渠決滯壅徧從  
水道訪曲折輕舟屏從泊河濱時入茅檐諮利病村農  
共許話艱辛澤被東南三百載到今功德未全湮嗚呼  
大賢久不作爾曹誰復知經綸今日河夫盡爨獨背似  
土牛耐鞭扑幾回持橐請官糧官糧早飽官胥腹重隄

方憂疫癘生。獨漉水深泥又濁。自是農夫性命輕。誰能  
久候官倉粟。但願功成早放歸。急向田間驅黃犢。

柳枝行

張 麋

河隄自古鐵與石。近日河隄柳枝塞。前歲河工未告成。  
今年柳埽又頒行。官糧一石柳一束。三倍秤來猶不足。  
胥吏如狼橫。索錢催頭那顧人家哭。楊柳青青滿舊隄。  
連年斬盡不生稊。滿船載向湖邊去。積久堆堆化作泥。  
君不見邵伯鎮南幾千戶。晨炊半是吳陵樹。

河上紀事

張永銓

三月逢三日。言別刊溝去極北。望關山揮鞭上驢背行。

行邵伯村落日明還海旁有萬綠園停驂爲小憩四日  
雞始鳴僕夫理征轡傍午過孟城入夕投林際五日屈  
安平遙遲河橋駐屈指三百里沿河走車騎左右皆洪  
濤長隄如帶繫瞻顧心茫茫馳騁防顛蹶勞動總不辭  
觸目心驚悸豈無城與郭煙靄涵一氣豈無樓與臺懷  
襄總如沸榆柳漾狂瀾膏腴皆淹泝纍纍百年墳水深  
沒碑碣白骨幾成遷遊魂何所寄歷歷梵王宮香臺半  
淩替遙見寺隨波近睇波圍寺四野竟彌天一望疑無  
地邂逅遇老翁痛哭且歔歔張子蹙然悲翦燭偏忘寐  
呼酒澆愁腸愁多不能醉謂翁聽我歌我歌爲世慮欲

識河源流一一猶堪記自元開此河通漕在淮泗緣渠  
尚淺溼海運原無廢勝國永樂時徙都都燕薊朝廷爲  
輸將乃命宋禮治其時采方言白瑛獻奇計遏汶勿復  
東盡出南旺界彙歸龍王廟河水分爲二北支達臨清  
南支接徐沛高下置水閘蓄洩常啟閉牽挽千萬艘至  
今爲成例誰知水逆行終非神禹智欲濬黃河流先奪  
淮水位一河且衝決况與羣流會今歲築堅隄明歲已  
隨潰此岸甫告成彼岸復傾圯歲糜百萬錢填海曾何  
濟天子爲宵衣河臣徒掩袂嘗讀古人書兼聞周用  
議河之不安流由於溝洫淤卓哉汝南君斯言真確義

古者衆建國各食地所樹不聞燕趙人仰給吳楚稅秦  
人壤阡陌沃土遂成棄地寶旣不登黍稷終難繼西北  
昔無禾因莫興水利東南患河衝其弊亦所致河從龍  
門來萬里滔滔逝若教流勿濫應使源先殺上旣分其  
支下自安其派我欲請於 朝下 詔布中外北地及  
中州設官理溝澮定理畫爲渠通流資灌溉里廣或五  
六里狹或三四淺深審水宜曲直隨地勢十年告成功  
沿河多分滙盡地皆腴田靡處非稔穗甸服粟米供轉  
漕可無費渠多走馬艱盜賊并難肆不治河已平不運  
漕弗匱不緝宥自消一舉三善備疏鑿何無謀壅障真

成鄙何以知其然水性有至理君弗信我言爲君且罕  
譬譬彼膂力人血氣還憑試弗遇麟閣榮或作黃巾恣  
譬彼智巧人心思任推賢不讀聖賢書必搜揚墨秘維  
水亦如之順逆隨所使善用功誠多強制害相倚子輿  
惡鑿言千古炯開示胡爲當事者曾弗加之意俯仰揆  
厥由一官傳舍置成敗畏是非利害工趨避緬懷鄭國  
僑孽畫風雷施試聽輿人歌欲殺旋欲嗣伏闕擬上書  
毋謂糞食鄙老翁驟然笑搖手口還語似嗤杞人憂疑  
請管窺細謂我一書生放言無所忌當世豈無人守轍  
終無異子爲貧賤者越俎謀奚爲不如賦歸歟結廬從

爾嗜重賦雖足悲且作秦越視水災誠可憫何異滄桑  
代凡此塊壘腸勿以縈胸次况乎經世權肯向幽人界  
言之誠匪難行之亦不易坐而矢諸口豈遂見諸事實  
生策未行痛哭徒爲贅我聞老翁言慨然發長喟

河兵謠

東南薰

我行至河濱一望驚困漉河兵悉河務縷縷爲我陳黃  
河道常改遷徒無定在今始南入淮雲梯關汪海濁強  
黃勢驕清弱淮流挽力築高家堰障之使東匯藉淮以  
制黃厥功自百倍運道積沙淤勢難通尾閘黃逆入清  
口奔注洪澤湖湖淮復挾黃湧灌高寶途民抱爲壑憂



何以通輓輸治源先葺歸仁隄殺流急宜濬海口坐使  
水由地中行衽席之安可長久

木龍歌

為泰州判官李雙士賦○木龍用以治河

見於宋史曾鞏為陳堯佐作傳誌其事然  
制度失傳漢陽李昫雙士匠心獨運與古吻合  
遂上其議於相國高公適清口禦壩工險高公  
用其法遂慶安瀾河東完司空仿行大效蓋木  
龍能挑水護此岸之隄而水挑即可刷彼岸之  
沙較之下埽開河事半功倍防河  
良法也不可再失傳爰作歌紀之彭廷梅

伏羲一畫開鴻濛萬類迭運五行中飛潛動植各有屬  
天用功大無如龍水火土金各分羣龍以木稱未之聞  
木之為物性則直龍之為德變不測宋時防河議造作  
曾鞏傳紀陳堯佐前人制度今無存不傳其法傳其文

李昉讀文因得法陳之相公 天聽納楨楠杞梓松杉  
構鳩材聚工在清口篋篠簞篠筌箭篠編纜惟急束惟  
密非橢非銳非圓方或伸或屈或短長盤踞上游護  
御壩木兮木兮龍力大我聞黃河九曲曲灣東灣西  
灘灣對灘灘長一尺沙灣深一尺窪議者遇灣必下埽  
遇灘開河引水道開河下埽年復年卽以二說之外心  
茫然乍聞木龍皆疑異紛紛猜忌生非議不見河東完  
司空用有成效奏膚功龍耶木耶請攷論象形按義取  
諸震良法誰其得要領前有堯佐後李昉雖欲勿用何  
能舍作歌徧告防河者

河患

郭起元

河患自古昔決溢分兩途決由不得達溢緣無所瀦徒  
潰決之小汎濫溢之餘溢出事恒有橫決真可虞寄言  
弭患者修防慎須臾

海口

又

禹河歸碣石代遠不可求海豐利津間歸墟所經繇南  
徙歲已久遂奪淮浦流下壅上斯潰屢殷汎濫憂潘公  
勤荒度策在束上游蓄清以刷黃沙淤無停畱良法至  
今守修防慎綢繆海口雖云冬罕與雲梯儔廣深非人  
力天造此遐陬滔滔東注水細大靡不收沛然達重洋

安瀾奠中州無爲事穿鑿築室滋道謀

登雲龍山見黃河北徙

金德瑛

雲龍頭角孤峯巖衆山青翠來相朝黃河猛迅山亦避  
獨缺西面容滔滔嵩室汴洛二千里鬱鬱氣象連平皋  
亭中賓主去已古尙許陳迹觀瞻豪彭城以河作地險  
一曲東注天然濠惜數萬戶處金底恃蟻弗穴金隄牢  
今秋下矚詫異事可厲可揭纔容刀始知上游孫家集  
一夜齧決崩洪濤北山點點類洲沚田廬多在銀盤坳  
清河水道被橫截逆入兗濟咸浮飄哀彼征鴻陷中澤  
羨爾逸鶴翔空霄古者治河不治運縱令游演存寬饒

今須頽首趨一線甘受約束隨吾曹自南自北兩俱病  
顧淮顧運功加勞薪芻木石日增壘但有淤墊無疏洶  
逢霖未免輒漲溢經霜不放積潦消當官隱諱冀苟免  
涓涓弗塞匪崇朝不然懷柔百神日胡獨河伯逞其驕  
僂仰諮詢動悱惻豈爲閏九重題糕明朝驛騎直北去  
臨流更驗荆山橋

赴淮渡江吟

錄一首

袁枚

昔年尹宮保奏我牧秦郵吏部議阻之勳格相羈留我  
今過此邦一望無田疇適逢黃水決赤子生魚頭使我  
果牧此何以佐一籌慨念今黃河勢合淮汴流祇因資

轉漕約束爲疽疣人自奪水地水不與人仇河身日以  
高河防日以周縱舒一朝患難免終年憂何不決使導  
慨然棄數州損所治河費用爲徙民謀更置遞運倉改  
小運糧舟水淺過船易敵淮事可休路寬趨海捷泛濫  
病可瘳此語雖驚衆此理良或優安得陳明堂并告東  
諸侯

答客問河防

陳熙

千金築隄埽九曲慎防維廳營汎百輩春夏秋三時思  
尺別深淺頃刻分險夷東備西復缺此安彼又危王者  
曰河帥獨建大將旗近置其輔開府同節麾奕奕入

州督臨事推總持勞勞幾觀察分道任驅馳每當盛漲  
候卽慮奔命疲泊乎水漸退憊矣人莫支客從皖上來  
笑問我所知我謂客勿喧聽我畢其詞治水無良法古  
昔語可思補偏而救敝因時以制宜水於天地間如身  
賴血滋壅之則爲患心腹及四肢宣導在循軌灌輸虞  
漏卮思患防之豫見幾安可遲土石工竝舉江淮績兼  
施衛民瀕海曲挽粟達京師當行願弗止當片莫相疑  
先成後或毀近察遠或遺未雨先綢繆所見聊測蠡

葦蕩營卽事

謝啟昆

鄆杜竹稱海蘆洲此名蕩飛雪亂晴晝不辨輪與廣計

畝踰百萬營制轄以兩其左濱海溢右居黃河上四圍  
天覆孟一片青浮盜荻芽拙芒刃老鞞森甲仗傷彼采  
樵人風雨無饑餽用以填金隄力與奔流障惟柔能制  
柔物理固難量

于公盡地利趙公乃廢之復於齊勤恪廣於錫山嵇

康

初于公成龍爲河帥始置葦營五十年間趙公棄與民  
爭訟不已雍正初齊公蘇勒復之嵇公曾筠更廣其制  
兩河實攸賴下樅束焚隨不惟固宜防緝奸亦在茲逐  
鹿鹿有三爭田田有蹊貨惡棄于地力不爲已私不知  
誰作偏邊界棄如遺計其所賦入國課輸毫釐情民貧  
天功豈肯勤畬菑遂致虞芮訟越畔多參差我無召公



德質成滋愧詞

乾隆二十九年當事以韋蕩濱黃河地不產蘆者千餘頃召民耕種每頃納課

二錢入分迄今開墾寥寥其墾熟者復墾入黃河遂致官民爭訟不已

海運苦無車舟運苦無澤乃名曰筏運制畧仿溝洫其廣不盈丈其深僅倍尺荷鋪俄成雨坳堂貯涓滴滄然有雲興歛澹遂充積草萊兼繩縛圍圓守定式一人負以趨聯絡累十百銜尾葛陂龍捷於泛波鷁轉輸達河孺次第受廣船忽焉杯水枯一東艱萬石蚩蚩魚鱉子盜決甚蠹賊厥職兼虞衡厲禁敢辭力

田賦有耗羨此亦有正餘正者有定數餘則隨盈虛譬如寡婦利秉穗遺錙銖但要充公用不得供樵蘇收之

以官帑一一歸河儲風波偶失利乾沒或有諸酒帶著

爲例欺罔庶消除向多失風飄沒柴束余仿糧艘酒帶之例通幫分賠故近日失風者少

田野食瓜果于律亦有誅矧此司筦鑰安可通苞苴我

詠行葦詩苞葉春風舒載廢蒼葭什采采霜落初萬卉

同一本慎勿傷鴉鋤清明有采青之禁

羊報行羊報者黃河報汛水卒也河在皋蘭城西有鐵索船橋橫互兩岸立鐵柱刻痕尺寸

以測水河水高鐵痕一寸則中州水高一丈例用羊報先傳警汛其法以大羊空其腹密縫之

浸以糞油令水不透選卒勇壯者縛羊背食不飢丸腰繫水籤數十至河南境緣崖擲之流如

飛瞬息千里河卒操急舟於大溜候之指籤知水尺寸得豫備搶護至江南營弁以舟飛邀報

卒登岸解其縛人尙無恙賞白金五十兩酒食無算台乘車從容歸三月始達余聞而壯之作

羊報行○按此卽  
元世祖革囊遺法

張九鉞

報卒騎羊如騎龍，  
黃河萬里驅長風。  
雷霆兩耳雪一綫，  
撇眼直到扶桑東。  
齧牙歎血蛟日紅，  
攫之不敢疑仙童。  
鬚卽出沒奮頭角，  
迅疾豈數明駝雄。  
河兵西望操飛舵，  
羊報無聲半空墮。  
水籤落手不知驚，  
一點掣天蒼鶻過。  
緊工急埽防尺寸，  
滎陽頃刻江南近。  
卒分下羊氣猶騰，  
徧身無一泥沙印。  
轅門黃金大如斗，  
刀割瓠肩觥沃酒。  
回頭笑指河伯遲，  
濤頭方繞三門吼。

淮上流民歎

張雲璈

淮黃歲歲漲動以隣爲壑，  
山清高竇水中央。  
十戶九家

歎漂泊去年水來田始耕今年水來田未成終年種田  
無一粒萬目懸懸水上泣西家無田散四方東家有田  
亦水荒有田無田皆逃亡夫擔簦婦攜筐零丁踽踽來  
他鄉他鄉不比故鄉苦便到他鄉誰是主去年施粥在  
揚州但道揚州爲樂土朝亦不得栖暮亦不得栖黃昏  
空巷風露淒富家大屋牢雙扉暫從簷下相爲依無端  
猛雨深濺泥男方呻吟女又嗝傷傷滿街面如墨官來  
議賑心孔亟朝廷日費百萬錢供爾流民纔一食君  
不見安瀾之慶誠爲多若要治民先治河不爾其奈哀  
鴻河橫流誰使年年甚此咎須知水不任嗚呼水不任

晉竟誰任。

挑河謠

李賡雲

挑河挑河河底沙多挑河得錢我腹果然淮水清河水  
濁淮強方能與河角淮迫河行使之速河流不停沙不  
伏河不停順軌行淮揚沃野千里平年年無潦年年耕  
年年耕年年熟年年秔稻堆滿屋人不挑河也果腹

河決歎

趙然

神河之水不可測一夜無端高七尺奔濤駭浪勢若山  
長隄頃刻紛紛決隄裏地形如釜底一夜奔騰數百里  
男呼女號聲動天霎時盡葬洪濤裏亦有攀援上高屋

屋圯依然飽魚腹亦有奔向隄上去骨月招尋不知處  
苟延殘喘不得死四面茫茫皆是水積屍如山順流下  
孰是爺孃孰妻子仰天一慟氣欲絕傷心况復飢寒逼  
兼旬望得賑饑船隄上已成幾堆骨。

河上雜詩

道光癸未冬日

梁章鉅

我初習外吏一麾來水鄉專城江漢間長年事隄障量  
移到東土乃復專修防河流本浩浩淮海彌湯湯袁江  
如釜底高堰如巖牆旣須黃濟運又須淮敵黃或資擎  
托勢旋虞倒灌強理河兼理漕所繫非尋常捍患復因  
利何由兩無妨

昔聞雲梯關河淮入海途行部乍泣止所見形已殊及  
關雖浩蕩出關猶康衢道周夾楊柳蕩畔圍菰蘆濁流  
中一綫委折百里餘更越青紅沙甫歸浩淼區今人喜  
耳食恆言暢尾閭挑濬功焉施淤墊漫難圖勞費且無  
已放手徒睽盱豈知治平策不外河渠書束水以攻沙  
名臣有遠謨

海口利用東河身利用深積久多所畱詎能免旁侵沙  
墊流自高岸隄隄遂沈古人創成法疏濬匪自今浚船  
亟往復鐵籠相差參江淮近十載填塞增欽峯置此獨  
不講徒擲虛牝金隱憂在睂睫斯理頗易尋

防河用碎石浮言多和附謂此前無仿厥病後將瘡我  
 昔直樞禁頻讀河臣疏一官蝨其間日擊甫有悟河身  
 本隆起浩浩沙所注掃根刷始深石質重乃固剛柔互  
 爲制水土永相護斷無外遊虞倒梗中泓路試看冬水  
 落兩岸軒豁露濺濺未停流粼粼總如故比來久瀾安  
 藉以殺河怒上節府庫縻下減芟薪數石蓄詳班書激  
 隄備酈注古昔有明徵莫緣防口誤瓠子歌曰隄林竹  
 今捷石蓄師古注  
石蓄者謂甬石立之然後以土就填塞賈讓策曰爲石  
 隄激使東師古注激者聚石於隄旁衝要之處所以激  
 去其水竝見漢書溝洫志又水經注曰漢永初七年令  
 於石門東積石入所以捍衡波謂之入激隄皆可爲碎  
 石垣坡  
 之緣起



我所司葦蕩疏材徧海曲以佐舉樾需歲採有額束乃  
緣物產豐難免弊竇伏議者如目睹惜者亦踵續謂倘  
盡量收何煩度支督貨惡棄於地况飽奸徒慾我思利  
所叢操之忌太蹙三營百千家長年資事畜一朝奪所  
恃事變焉可卜輸將自有程忍創聚斂局

修防歲無已先事籌蕩柴其名曰圍估霜長期必來初  
循大河隄直到海北隄年來歲額絀苦旱多枯摧泉源  
久涇廢膏腴等汙萊河湖近映帶斥鹵資盪排直須講  
蓄洩亟使溝渠開

河隄經費繁袁浦冠蓋萃往者風侈靡揮金每如芥安

危且利蓄悖出尋亦敗比來風氣上去奢復去泰歲支  
有常經仕宦非往概庶無撲滿虞且免漏卮匱我本澹  
泊人喜值清明會古心先自鞭宥費要共汰幸毋揚其  
波官謗吁可畏

治水篇

陳文述

治水如治病症必探其源治水如治兵局必籌其全慮  
患在事後決策在事前扶危與定傾但令平不偏今之  
治水者所見殊不然不與地理準不與天時權但恃勢  
與位未許他人賢虛懷與和衷二者無一焉高寶爲欽  
器澹海鄰桑田洪湖爲漏卮巨浸成滔天見水不見地

國朝詩金 卷四  
三  
災民殊可憐減壩雖云開黃河水濺濺禦壩雖繼啓洪  
湖流涓涓湖水壅不消河身淤益堅古方治今病那得  
沉疴痊羸師當大敵那得軍威宣豈無和緩學疇能猜  
疑捐豈無孫吳略疇能倚任專得免每忘蹄得魚恆忘  
釜空談亦何補自悔言譏談

江隄行

示馬北平明府

周凱

大江來自蜀千里趨江陵浩瀚而砰訇一隄焉能勝居  
民護田廬力欲與水爭東西兩岸側建隄如修紐江身  
日以高隄身日以增下視諸村落江水高飛盡瀕江各  
州邑歲受陽侯凌請帑論鉅萬

隄有請帑修者勒限觀厥成我

來何家準丈尺量以繩寬高悉如法瑣屑詢者民鬱隄

形如月謂以緩相承上下兩搭腦隄新舊交接處曰搭腦築者尤

戰兢砂礫挖務淨礮杵須層層且言此官工子來俱歡

騰堅牢應無慮請看隄上岷比屋如鱗次猶懼隄難憑

別有民修者又有官督民修者其力固未能工頭使狡獪胥吏

隙是乘強者抗不出弱者默不膺愚者事畚鍤黠者醉

友朋工力半虛耗侵潰相頻仍民力不足惜民命亦堪

矜是在賢父母奸猾重警懲吾言百之一聊為長者陳

河決中牟紀事癸卯六月何 棧

黑雲壓隄蒙馬頭河聲慘澹雲中流淫霖滂沛風颼颼

蛟螭跋扈鼃鼉愁墮竹捷石數不讎公帑早入私囊收  
白眼視河無一籌飛書驚倒監河侯一日夜馳四百里  
車中雨漬衣如洗暮望中牟路無幾霹靂一聲河見底  
生靈百萬其魚矣河上官僚笑相視鮮車怒馬迎新使  
六百萬金大工起

河隄

楊文藻

河流雄萬馬河隄險一簣築隄豈無防原爲不虞備下  
流苟勿壅胡由致崩潰治河無賈讓爭以下策試清淮  
弱如綫濁河日奔恣淤沙積百丈海口塞弗治河身高  
于隄帆檣迴雲際蟻穴倘一決驚濤注平地治病不察

脈橫裂適爲累嗟哉神禹功疏鑿豈小智

橋梁

石橋謠

橋爲雨水沖破土人索扛車錢無算行客盡阻

馮詢

橋上泥石之皮皮剝盡骨獨支橋上水跨橋起石不爛

水不止橋上車破橋趨車如龍化爲魚橋上馬重車駕

不得上不得下橋有民怒狺狺予以錢笑欣欣橋有客

聲唧唧行路難立道側橋有官橋不看水灌城有城門

繩橋

灌口繩橋見范成大吳船錄及坡公詩今失其故處矣之河西者從上游白沙渡然極湍

險一舟覆輒百人溺乃召父老諮地利而重建焉行旅稱便紀以詩吳昇

飛緹杙閣牽長虹九行五道懸穹隆千牛輦石轉地軸

萬匠磨斧貪天功圍闕左右曳且掣度版首尾衡而縱

其長百有二十丈蜿蜒直徑河西東大風幡幡忽掀舉  
天矯作勢騰飛龍染家晾帛漁曬網比擬方信前人工  
閱冬徂夏事迺戴由近及遠行相從我爲長吏請先導  
臨淵之懼心忡忡一跬踉蹌愈簸盪甚我疾走毋春容  
上無一髮可援手下則百尺奔驚瀧未能乘查竟八月  
已似梯霞而御風身如雲浮腳棉軟達岸迴視人飛空  
山民緣竿止一索到此騁步康莊同肩擔首戴踵趾錯  
見星未已來憧憧此邦扼要枕夷夏北走番地西羗戎  
飛江鐵螂苟不設雲棧何處通蠶叢自今陸海廢葦渡  
餒腹空吼蒲牢鐘梢公賣船且勿憫要除溺鬼洪濤中

七里溝建橋歌

許乃穀

環邑七里溝水阻路人不得行余詢土人問何不建橋曰環無橋且其地崖陡沙鬆水猛甚作亦弗成也因思先大夫牧黔西時曾造鐵索橋今三十餘載矣欲效之而無可任者會邵陽聶君創祿欲於城北為橋十三志未遂也余鼓舞成之事竟輒以斯役屬焉詩以記之

環江萬疊飛驚濤環江千里無一橋行人躑躅過不得  
行吟涉畔心怵怵七里溝前兩山立矗起直上干雲霄  
山雨忽來山欲浮魚龍直上山巔遊濁流怒捲石如屋  
亂舞江心擲平陸一心利濟豈無人到此驚嗟都蹢躅  
木石如何與水爭長虹那得臥縱橫我思先子牧黔陽  
曾鑄生鐵為橋梁屹立波心三十載至今萬姓銘肝腸



小子法師用鐵索兩崖對峙石爲腳以鐵入石鎔兩頭  
 沙走濤飛不能落經始戊冬迄巳春司其事者聶勗祿  
 聶君爲橋一十三往來行旅無停驂遊客居然肩事勇  
 吾儕對之能無慙烏虜安得化爾千萬人坐使宇內皆  
 精神橋乎橋乎利一邑但推此意九州四海同熙春

黨河柳橋詩

敦煌城西黨河激流東北水湍沙深爲橋輒圯  
 夏涉水漲幾滅頂冬涉冰凝苦蹈刃邑人童榮  
 誓建橋而力不逮僅絙長木於上今三十餘年  
 步者往往顛踏余憫焉按國語單襄公適陳見  
 輿梁不修知陳之衰五代王周因定州橋壞覆  
 民租車曰橋梁不修刺史之過乃償民粟治之  
 焉烏虜是有司之責也爰與少尹余君捐廉爲  
 之倡沙州營官弁泊邑人士商賈醵金繼之囊

土椽基以沙棗木入水不腐也截作籠實以瓦  
石稽土護以毛柳刺松層疊而起爲柱木分於  
四駕大木其土舖以稽土遵若平陸凡高二丈  
三尺長三十二丈濶二丈有奇兼建棹楔於橋  
東西以連其氣費制錢一千六百餘緡邵陽聶  
創祿邑住王繼文工胥李潤董其事道光壬辰  
十月庀材癸巳正月興工十月葺事沿流植  
紅柳萬株榜曰柳橋用坡公兩橋詩韻落之

黨河發南羌一氣飛虹霓夏漲濶於江秋涸小若綸躑  
躑人蹠沒蹴踏馬足低奔湍拔矮樹急流吞高隄冬涉  
冰削刃顛踏非人擠西隅一千家日日來城西帶水似  
絕壑迢遙難攀躋誰著塞雁翅誰騁天馬蹄有舟數人  
受無橋萬衆稽乘輿而濟人笑殺閒鷺鷥蟻集事登鋪  
魚貫階梯幸臥垂虹影可以渡障泥鄰女謝輕車相

約出中閨晨昏任熙攘童稚偕提攜燕泥成駕鵲牛刀  
嗤割雞森森蔣柳隄固同沈犀千條灞水情一枝陽  
關黎不見金城橋黃河第一橋在蘭州長河入天臍河至砥石入海爲天臍

關征補

北新關

馮詢

北新關吏大於虎咆哮生風爪牙舞北新關吏小於蟻  
腥羶未附心先喜 朝廷宮錦重七襄幣帛之賦徵蘇  
杭當關司權賦有則嗟爾關吏何披猖有客扁舟自游  
泳入境何知須問政窮行不辨導行錢度關忽下遮關  
令豈有居奇飽吏饗求疵向客窮吹毛羈留三日恣大

索指揮羣役如搜牢本爲營私借徵賦發篋無私轉生  
怒呵斥空成醉尉曠傳聞卻笑聾丞誤算緡亦復計錙  
銖籌課何曾充府庫嗚呼關禁懲奸商奸商度關如康  
莊長官賄累吏乾沒搜剔乃及寒儒囊儒冠誤人徒自  
苦不如去作河東賈

揚關厄

李琪

何處關吏強揚州關吏強身爲觀察使腰下寶帶銀間  
黃佐以江都令旁列伍伯紛成行估客過揚關橫索橐  
中裝行旅過揚關倒屣復傾箱嗚呼譏察分應爾權稅  
事不妨所嗟舟人子船料苦難償珂裹巨編尙易償艇

舨五尺惡能當餓隸如虎復如狼索錢不得繫道旁無  
辜榜掠皮肉傷頸上往往鳴銀鐺銀鐺榜掠亦甘受但  
願放船歸故鄉豈意牙僧已估值不知售與誰家郎一  
家婦子皆踉蹌攔道大哭聲何長亡何竟作溝中厓回  
顧官吏開華堂皂衣將炙緋衣爲行觴將炙復行觴爲  
樂渠未央嗚呼揚州官吏一何強

貢獻補

詔罷高麗貢鷹歌

王士祿

真人御極臨八荒百蠻九譯皆享王西旅之葵越裳雉  
貢物各各因其方海東俊鳥好毛質鐵爪金眸猛無匹

九都作貢來 天家特受鞬鏃佐累舉  
瞭鷹臺上秋天  
高乘時驅獸行蒐苗羽騎驂驪 翠華至星旃雲漢紛  
周遭蒙鵠射熊未足羨跋犀瘴兕徒遮邀是時摘條試  
一縱萬人昂首瞻青霄飛鳥狡兔失巢窟委身灑血填  
君庖 至尊往往動顏色玉虬迴轡鳴蕭蕭柔遠傳聞  
勤 睿旨詔罷奇毛自今始行葦兼存踐履慈茁葭漫  
賦春田美聖神舉動殊尋常此事悠悠古誰比君不見  
虬鬚天子眞英雄受諫鷄死藏懷中

國朝詩鐸卷四終

河防補

河工四汛詩

見潘煥龍臥園詩話

麟慶

桃汛

漲暖桃花閱茨防

即今之埽

金隄宛轉東流長垂楊遙映春

旂綠秀麥低連汛水黃

麥黃汛在桃汛後

竹箭波翻飛羽急皮

冠人到獻糴忙

例於春汛發堤搜捕糴鼠

書生自問無長策仗節深

慙服豸章

伏汛

風輪火傘日無休來往通隄大道頭黃綻野花沿馬路

大隄每堡開路二日馬路

綠紛細草襯龍溝

隄上放水處曰龍溝例用淤土種巴根草襯底

以防關心水勢逢金旺屈指星期近火流荻蘆豆花均  
汕刷均各將次到先時修守費前籌

秋汛

節交白露又巡行秋水瀾漫望裏平搜底不同桃浪暖  
蓋灘已見荻苗生長隄梭織勞參伍列堡環排肅弁兵  
傳語通工休玩愒大家踴躍待霜清

凌汛

河冰凍合朔風粗策馬巡行厯舊途夾岸積凌全漲白  
沿隄插柳半塗朱樁排雁齒參差掛塚比魚鱗上下鋪  
預祝安瀾來歲慶殷勤修守勗兵夫